



沈隱侯集卷之三

詔

沈文季加侍中詔

散騎常侍尚書左僕射西豐縣開國侯新除鎮
軍將軍沈文季業宇流正鑑識超凡秉茲恭恪
誠著匪躬難起非慮密邇墉圻罄力盡勤萬雉
增固寵服攸加實為朝典可侍中僕射新除侯
如故主者速施行

崔慧景加侍中詔



護軍將軍樂安縣開國子慧景志氣淹通識履
詳正誠烈欵盡義簡朕心加榮近侍抑惟朝序
可加侍中子如故主者速施行

王亮王瑩加授詔

京輔華貫端副嬰重政首民經任切朝寄尚書
左僕射亮濬哲淵深道風清邈時京疑民譽僉
望所歸中領軍南徐州大中正南鄉侯瑩德宇
夷曠鑑識凝遠闕協隆內外允諧途徒從慝躬
衛時難氛祲旣澄竝宜光贊緝熙穆茲景化亮

可侍中丹陽尹瑩可侍中尚書左僕射本官中
正侯竝如故主者速施行

臨川王子晉南康侯子恪遷授詔

侍中臨川王子晉志業清敏器尚夷通祕書監
右領軍南康縣開國侯子恪理識閑悟思懷韻
警宜出聞朝政入侍帷幄子晉可左臣

疑是民
字避唐

諱尚書子恪可侍中王侯竝如故主者速施行

王茂加侍中詔

居中作衛號望清重任總儲宮朝難其選望蔡

縣開國公新除尚書右僕射茂器度淹弘志局
詳穩契闊懌夷情深恒寄顯命載加允副僉屬
可侍中衛將軍領太子詹事開國公如故給鼓
吹一部主者施行

授蕭重休左僕射詔

尚書萬事之本隆替是寄總司頓闕宜速有人
征虜將軍吳興太守建安縣開國子蕭重休才
學一作淹通識裁詳允內著嘉庸外敷美政入
副朝端僉議斯在可守尚書左僕射餘如故主

者施行

南史蕭惠休為僕射重休恐誤

授王亮左僕射詔

朝端任重刑政

一作禮斯出自非民望時宗莫諧

茲舉通直散騎常侍吏部尚書領太子左衛率
王亮器識夷遠風鑒清奧贊務釐朝庶績惟允
宜崇名器以副具瞻可尚書左僕射主者速施
行

封申希祖詔

持節督司州諸軍事冠軍將軍司州刺史申希

祖志器沉隱才略開濟在咎多難任叅心膂爰
及中興忠欵彌著契闊艱虞盡其心力建獯獫
侵斥武節颺騰殘寇外殄危城獨困休庸茂績
朕有嘉焉宜錫茅土以疇勤烈可封開國伯食
邑五百戶本官如故主者施行

封三舍人詔

輔國將軍驍騎將軍南高平太守兼中書通事
舍人沈徽孚給事中驍騎將軍臨淮太守兼中
書通事舍人王咺之監朔將軍南濮陽太守兼

中書通事舍人裴長穆竝以素胄清才服勤禁
省契闊劬勞自須多難軍國務殷內參帷幄外
濟師旅忠規欵志義感朕心宜錫茅社同莅賞
冊可封三百戶開國縣伯本官郡驅使竝如故
主者速施行

郊禋赦詔

朕昧旦

爽一作

夙興念茲治道而明不燭遠弘之

未易仰尋先烈思致隆

升一作

平日頃多故戎役

一作

代有軍政國容事緒非一刑禮叅用未臻

穉簡向隅之情永言增歎今郊禋載洽幽明允
從思隆嘉祉被之兆庶可大赦天下主者施行

南郊恩詔

卜日禋饗政道莫先厚下布澤哲王是務朕仰
祇靈眷俯臨億兆歲象迴環恭事亡及牲重必
荐感敬備申升煙燎於穹昊致精誠於太一思
霑可亥切南風也潤惠茲窮生應天監三年內犯奪
勞及左降可悉原降繼市職不充人身及家口
質繫悉散還私家督備前歲三五犯譴因及隨

曹景宗授司州委叛應譴役者竝量所蠲降尚
書所檢巧陳淫辭普宓開恩百日各聽自首不
問往罪京師三縣尤窮之民詳加賑恤主者速
條格施行

又

朕肅膺乾貺君臨率土雖日晏劬勞而仁恕未

洽星琯驟迴履端告始禋享云備誠敬廉

一作兼

申宣和布澤情淡待旦凡內外文武可各賜勞
一年叛亡未擒若百日內自首還役不問往辜

女子質繫恣且散遷文書輕重坐臯竝皆從原
主者詳為條格疾速施行

改天監元年赦詔

五精遞襲皇王所以受命四海樂推殷周所以
改物雖禪代相舛遭會異時而微眇迭用其派
遠矣莫不振民育惠光被勅元朕以寘闇命不
先後寧濟之功屬當期運乘此旨來同梁書心
萬物遂振厥弛維大造區夏永言前蹤義均慙
德齊氏以代終有徵曆數云改欽若前載集大

命于朕躬顧惟菲德辭不獲命寅畏上靈用膺

梁書作應

景業執禋柴之禮當與能之祚繼迹百王

君臨四海若涉大川罔知攸漁洪基初兆萬品
權輿思俾慶澤覃被率土可大赦天下改齊中
興二年為天監元年賜民爵二級文武加位二
等鰥寡孤獨不能自存者人穀五斛逋布口錢
宿債勿復收其有犯鄉論清議贓污淫盜一皆
蕩滌洗除前注與之更始長從敕繫之身特皆
原遷亡官失爵禁錮奪勞一依舊典

平亂赦詔

朕肅纂乾統思弘祖業方欲克廣法猷寧濟遐
邇實賴羣才共康世務至於股肱宗戚情委特
隆垂拱責成緝熙是寄而各包藏禍心規縱醜
逆朕每存容隱冀或能悛而靡懲前慝彌結後
釁七百業懃宗廟事重不得不垂涕行戮以義
斷恩或藩屬皇宗或睦姻近戚夫豈不懷社稷
故也雖四門已穆羣凶靡餘而泣辜之嘆義兼
自咎方勵精思治登賢任官隆平之化庶從茲

始宜播嘉惠咸與維新可大赦天下自今月二
十日昧爽已前謀反大逆手殺人以下皆赦除
之頃歲軍旅繁興叛征者衆其質繫家屬及同
伍代役三署見徒詳所由原遣主者施行

大赦詔

王室多難祲沴相仍昔歲紛阻鋒交九達今茲
狂煽兵連萬雉時事屯危罕有斯逆故今迷疑
互起向背者多元惡旣懸猜懼彌廣奔亡草澤
自反莫因近雖曲赦與之更始而愚昧之徒猶

多竄伏且遏寇未夷役連遐邇刑政弛張陷罪
 非一思所以曠敷嘉惠被之億兆可大赦天下
 凡與崔惠南史作慧景協契同謀首為奸逆爰及降
 叛輸力盡勤良由世漸交零流源漫遠風槩靡
 立以至如斯悉皆盪滌一無所問凡諸反側咸
 與維新竝加宣慰還復民伍罔信之明皎如日
 月勝勒畿要咸使聞知惟崔惠景諸子不在赦
 例主者施行

立太子詔

即昭明太子

朕屬當期運係迹前王思所以長壺流祚垂之
 萬葉百辟咸以元良之寄有國莫先自昔哲后
 降及近代莫不立儲樹嫡守器承祧乃芴挹羣
 議遠惟七百建茲蒙稚仰副宗祊承華肇開崇
 基克永無疆之慶非獨在余恩霑渥澤被之遐
 邇可賜天下為父後者爵一級王侯以下量賜
 幣帛

立太子赦詔

朕夙纘璿祚君臨四方夕惕寅畏若寘淵谷思

所以光闡洪基克隆鼎命王公卿士咸以為樹
元立嫡有邦所先守器傳統於斯為重是用俾
茲幼蒙體乾作貳永固宗祀以貞萬國元良之
寄非獨在余宜令嘉慶被之億兆可大赦天下
賜民為父後者爵一級主者速施行

封授臨川等五王詔

神牧帝鄉

類集作神州帝城

冠冕列岳渚宮樊鄧形勝

是歸居中作衛翌宣戎勳

類聚作重隆茲

或作名寵號

寔允舊章竝非親勿居惟賢斯授西中郎將護

軍宏朕之外

類集作介

弟早宣

亦集作富

德譽董一藩政

緝是嘉庸國禮家情瞻寄隆重使持節督南徐

兗二州諸軍北中郎將

梁書作輔國將軍

南徐州刺史

秀風穎雋邁識業標簡任居藩翰政以化成使

持節都督雍梁南北秦四州諸軍事安北將軍

梁書作冠軍將軍

寧蠻校尉雍州刺史偉體韻淹穆神

寓疑正綸綸夷雅

類集作經

叅贊王業冠軍右

衛將軍恢祖檢外洽淵量內湛奉職鈞陳周衛

以穆使持節督荆湘益寧南北秦七州諸軍事

安按梁書作平西將軍荊州刺史憺秀識冲情允文

允武經啓王業寔有厥勤竝契闊綢繆分形竝

氣處家盡其匪躬朕承運迭興光宅四海藩維

廣樹經朔攸屬出納之宜望實惟允宏可使持

節散騎常侍都督揚南徐州諸軍事後將軍揚

州刺史封臨川郡王秀可進號征虜將軍餘官

如故封安成郡王偉可使持節散騎常侍都督

雍梁荆寧南北秦六州郢州之境陵司州之隨

郡諸軍事寧蠻校尉雍州刺史將軍如故封建

安郡王恢可侍中前將軍領石頭戍事領兵景

佐封鄱陽郡王憺可使持節都督荆湘益寧四

州諸軍事平西將軍荊州刺史封始興郡王食

邑各二千戶

勸農訪民所疾苦詔

執耜斲虧劓縣磬比室秉機或惰則穰褐繆年

非怠非荒雖曰王道不稂不莠實寄齊書作賴民稊

頃歲多稼無麥遺秉如積而三登之美未臻萬

斯之基尚遠且風土異宜百民殊務刑章治緒

未必同源妨本害政事非一揆冤旒屬念無忘
夙興可巖下州郡務茲齊書畊殖相畝闢墾廣
開地利深櫛國本克阜民天又詢訪獄市博聽
謠俗傷風損化各以條聞無使瘡痍之苦載興
比屋主者詳為科齊書格稱朕意焉

搜訪隱逸詔

高尚其志義煥通爰山林不出訓光惇史朕聽
朝晏罷尚想幽人蒲玉之禮佇聞峻節可班下
州郡博訊巡遠若有道映丘園事孚高尚可以

弭競遷澆還風拯俗皆以名聞靡或遺漏朕將
闢衢室而寘几杖開東序而授袞職庶令江海
無遺異人必至

資給何點詔

遠翹高情前王所賢義兼咎款倍用興懷徵士
何點居貞物表縱心塵外夷坦之風率由自遠
往因素志頗申宴言眷彼子陵情兼惟舊咎仲
虞邁俗受俸漢朝安衛逸志不辭晉祿此蓋前
代盛軌往賢所同可詳加資給竝出在所日費

所資須太官別給既人高曜卿故事同垣下

魏表渙
字曜卿

肅荆龐義士獻物者詔

咎義舉之初人懷自竭輸賦罄產同致厥誠言
稔一槩思有所酬其雍荆郢三州有獻物助軍
囷者外可詳加蠲報

使𠙴方士民陳刑政詔

徑寸之室或隱泥沙以人廢言君子斯戒朕聽
朝晏罷思闡政術雖百辟卿士有懷必聞而蓄
響邊遐未臻魏闕或屈以貧陋或間以丛川頓

足延首無因奏達豈所謂沈浮靡漏遠邇兼得
者哉四方士民若肯欲陳刑政益國利民倫儼
幽遠不能自通者各詮條布所懇於刺史二千
石有可申採大小以聞

立左降詔

刑乖政失其源已久罰臯之奏日聞於蚤朝弊
獄之書亟勞於晏寢免黜相係補代紛紜一離
讐囚乃永歲月非所以棄瑕錄用隨分盡才者
也是故減秩居官前代通劓貶職左遷往朝繼

軌自今內外羣司有事者可開左降之科

降歿臯詔

朕樹洪業光宅區宇而本枝之慶未廣椒掖膝
衛之地猶闕藩屏言念弓韜未能忘懷策三子
始有盤石之資於焉彌固慶雖自己恩加覃及
凡歿臯可降一等五歲刑降二等三歲刑以下
竝悉原放

立內職詔

刑于垂訓周文所以表德壺闈失序漢氏所以

喪邦竝被諸方策式昭戒勸魏晉以來雖云簡
薄而內職名號參差不同在宋太始位置繁縟
遂設九品且擬外朝填委椒掖徵費無已自此
相仍踵以成舊昭陽九華千門萬戶朕受命自
天始基七百思所以立坊自邇貽厥方來前代
職品所宜因革外可詳議務令該允

制

封徐世標制

驍騎將軍彭城令徐世標才略貞濟志懷義烈

忠節內款勳勤外著禦侮折衝任惟心膂頃奸
慝潛煽危機驟發夷凶弭難實有力焉宜命賞
疇庸錫茲土宇可封開國縣子食邑三百戶

授李居壬等制

新除太子左衛率軍主李居壬志識開敏器懷
貞濟盡力禁門誠著夷險新除太子右衛率軍

主潮陽

齊書作沙陽

縣開國男胡松性業詳固才用

果烈新除節督青冀二州諸軍事寧朔將軍青
冀二州刺史栢和剛正欵率屢著勤効新除左

中將軍主鴻選氣質強果秉心壯宣竝反旆南
轅以赴危難身先士卒翦此鯨鯢功勤碩茂宐
隆賞典居壬可封一千戶開國縣侯松可增封
為七百戶和可封五百戶開國縣伯選可封三
百戶開國縣男新除持節刺史將軍主男竝如
故主者施行

封左興盛等制

逆豎王敬剽縱兵內侮陵斥畿甸輔國將軍叅
軍將軍事

齊書作前軍司馬

左興盛直閣

齊書作輔國

將軍

劉山陽受律前驅焱勇爭路或衡至晉旆或陷
懸中麾元惡梟至氛梗載龐賞不踰時義弘前
典可封開國男食邑二百戶并進位一階主者
速施行

授蔡法度廷尉制

民命所懸繫乎三尺尺一作止殺除殘一作寔由
乎此是以臯陶作士五刑惟明于張莅官世無
寃獄且漢代律書出乎小杜吳雄以三垂灋家
係爲理臧部恭以律學通明仍業司士爰及晉

氏此風未泯叔則元凱竝各名家自茲厥後斯
尚漸薄迄至于今損棄頓盡衣冠士子恥復用
心州郡姦吏恣其取捨舞文弄法非止一塗朕
膺天受命爲兆民主每一念此忘寢與食尚書
刪定左曹郎中蔡法度少好律書明曉法令世
之所廢篤志不怠至於章句踳滯名程乖礙莫
不斟酌厥衷允得其門方欲寄以國刑開示後
學文一作才取士豈有定方自世術澆流浮僞
雲起量計多少辯校錐刀若遵往從舊守而勿

失豈所以軌儀上世垂風于後宜加褒擢弗繫
常階可守廷尉卿主者施行

授王績蔡約王師制

冠軍將軍司徒左長史始平縣五等男績華宗
冠冑器質詳和都官尚書約清源素範體業倫
正訓茲蕃國僉議攸在績可隨郡王師加散騎
常侍男如故約可零陵王師加給事中主者速
施行

敕

武帝踐祚後與諸州郡敕

欽惟遂古爰及近代雖禪代異時而成功一揆
豈惟靜民寧亂實由符運總集故能啓業垂統
光宅區陬齊氏邁茲昏詖斯亾奄及民命蠢蠢
倒懸非喻朕大懼四海舟覆二象雲傾億兆與
岷嶠竝燎搢紳與蘊崇共日永言悽悼發憤經
營推鋒投袂電擊風掃藉上天之靈因熊羆之
用德未半古功侔前烈齊民旣欽若虞夏高揖
萬邦兼以冥符先著樂推攸在幽顯宅心辭不

獲命猥以虛冥君臨萬囿川壑之懷寤寐盈慮
方欲昧旦丕顯日昃忘勞思與賢能康濟世道
卿擁旄萬里共治是寄當求民瘼畱念獄市威
斷以御強猾仁惠以撫貧孤使遠近幽深咸得
其所方虛位欽能懸爵佇効勿令漢代璽書歎
行於自古晉世班條靡用於茲日想加克勉副
其側席

為武帝與謝朓敕

吾以菲德屬當期運鑒與吾言思隆治道而明
不遠燭所蔽者多實寄賢能匡其寡闇當謂山
林之志上所窻弘激貪厲薄義等為政自居元
首臨對百司雖復執文經武各脩厥職羣才競
爽以致和美而鎮風靜俗變教論道自非箕穎
高人莫膺茲寄是用虛心側席屬想清塵不得
不屈茲獨往同此濡足俊望釋蘿襲袞出野登
朝必不以湯有慙德武未盡善不降其身不屈
其志使璧帛虛往蒲輪空歸傾首東路望兼立
表義軒邇矣古今殊事不獲總駕崆峒依風問

沈隱侯集 卷三
道今方復引領雲臺虛已宣室紆賢之愧載結
寢興

與何胤敕

吾猥當期運膺此樂推而顧已多蔽昧於治道
雖復劬勞日昃思致隆平而先王遺範尚蘊方
策息舉之用存乎其人兼以世道澆暮諍詐繁
起改俗遷風良有未易自非以儻雅弘朝高尚
軌物則汨流所至莫知其限治人之與治身獨
喜之與兼濟得失去取爲用孰多吾雖不學頗

好博古尚想高塵每懷擊節今世務紛糺憂責
是當不得不屈道巖阿共成世美必望深達往
懷不若濡足

表章

謝賜新曆表

竊惟觀升辯圓馭生爲本審昔分壘稼政莫先
何則勝殺無舛拘忌之理難忽珠璧有徵禮節
之原攸序

爲皇太子謝初表

臣實蒙稚溫文以闕不閑三善之訓未習四學之儀雖問安內豎因心自發而視膳寢門未任再至乃降皇慈夙膺盛典式體宸極守器宗祗顧循幼志如臨冰壑

致仕表

徒以桑榆無幾時制行及不朝之禮忽在今辰使反身敝廬待終窮巷臣又聞之懸車散髮其來舊矣昔廣德請骸義在量力二疎知止懇貽後悔數年以來稍就盡竭氣力衰耗不自支持

若蒙天地大恩造物洪施拯其隆滿之切救其害盈之災譬彼日昃假榮終朝踟躕夕景少觀盛化宅壤歸泉自無云幾祈仁仰澤事止寸陰爲始興王讓儀同表

徒塵翠幄方降紫泥以茲上令用隔下情况高擬萬石爰均八命室等天潢服加黼黻出則高陪千乘入則仰司百揆陛下道苞九舜明出十堯萬微必理一物興念有紆玄鏡鑿垂止水

拜尚書令到都上表

竊位之譏允當斯責王命私請有事相傾油雲
湛露從降旻昊之德弱縞輕蟬不載瓜嶽之重
登階望席悅焉失步

讓僕射表

臣聞役壯休老上典所優晨行暮息事身恒分
若夫玄黃未已非秋駕之衛筋力爲用豈強飭
之時養老杖鄉抑推前典服戎告謝親學匪任
宿肉極其虛憊歲制防其不棄寔所以蠲假衰
疾收屏淪暮

爲褚炫讓吏部尚書表

竊惟玄素未辯必謬朱紮之察規矩或昧理粲
方圓之功東西兩漢左雄孤絕於前南北二晉
山濤莫嗣於後良由性藏於貌才隱乎心楚越
無以況其迴殊山川未足方其險阻雖復拂暗
爲明免過生智亦何以登奇收異離渭分涇

讓五兵尚書表

臣聞百舍之趙非宿春所資千里之越豈一葦
能泝何者裝輕適於路遠舟弱疲於濟深醜貌

沈隱角集 卷三
悴容不籍鑿於淄水驚足蹇步終取躓於鹽車
謝封建昌侯表

陛下投袂萬里拯厥塗炭臣雖心不吠堯而迹
淪桀犬此剿王業始基臣所不與徒荷日月之
私竟無蒸燭之用天命玄鳥非止今日受命作
周其來久矣雖復備數樂推與同謳頌而誠微
弱草效闕織塵遂班山河之誓叨佐命之賞亦
何以慰悅帷帳酬報爪牙

爲柳世隆讓封公表

臣聞懸旌玉塞貳師尚黜其功伐鼓炎州伏波
猶懼其賞徒以兼委之施或難固辭抽心之情
必無雙奪是故俛容青閣願還慈於裂壤竊步
丹墀希收寵於開賦咎竄命窮雉難迫勢孤沈
版未難負戶非切及顧溫青之館思結尊慈之
懷累葉喁喁舉門惴惴臣事逼君親理非外獎
實賴朝暮謹肅宰略遐震奔鯨外勦臣何力焉
幸得扶老攜弱重出幽堵還軸歸驂再踐鄉路
豈可資國青以邀其功因豕功而饗其報遂使

甘霜受電之心有同於飾請皎日大河之志匪
殊於貌謁

爲南郡王讓中軍表

臣聞建侯茂則非賢罔樹分器鴻典惟懿寔先
而臣挹道未弘踐義多缺徒升國彝空襲宸寵
光珪華組掩藹於關垂令采徽猷寐寐於甸表
晨伸委帶夕軫臨顏皇衢肇啓鼎運始資魯衛
兼啓義邈周年齊楚竝建禮高漢日臣以末第
聯輝上序拓履荆阿懷璽寢曲拊志惟熏佩握

知擣

謝母封建昌國太夫人表

伏見詔書以臣母封爲建昌國太夫人慶溢蓬
門榮流素族恭荷屏營罔識攸寘臣稟訓私閨
志塗靡立勉以爲義誠有由然輸力致身曾無
萬一天慈罔已至德彌光探其私志降此洪澤
榮親之至始自微臣率斯道也方流萬物草卉
輕命固莫云爾

爲長城公主謝表

奉策書封妾爲長城縣公主徽命降臨慙腆妄
寘妾膺靈稟氣育景璇閨弱志易淪柔德難樹
雖復式脩姆保莫敢或違而肅雍不著穠華蓋
闕不悟宸暉曲漸彝章夙賁籙此恩加遽延典
策湯沐光啓珩緄昭被

薦劉粲表

陛下則天開業冠帶要荒輶軒韋轂交軫於遐
路捨築投竿相望於魏闕或以開圻未採管庫
遺賢執戟忘疲倚輶不息

注制旨連珠表

竊尋連珠之作始自子雲放易象論動模經誥
班固謂之命世桓譚以爲絕倫連珠者蓋謂辭
句連續互相發明若珠之結排也雖復金鑣互
騁玉軼竝馳妍蚩優劣參差相間翔禽伏獸易
以心威守株膠瑟難與適變水鏡芝蘭隨其所
遇明珠燕石貴賤相懸

爲柳兗州世隆上舊宮表

舊宮蘊靈千古合祥百代萬祗相祉八神警室

事超齊甸義邁譙宮故能屬輦道於天階命帝
闕於霄路實宜樹闕疏壤寫極上穹克播徽塵
永光盛烈

上建闕表

恭惟哲后舊章必修眇矚前王復古為賢伏惟
陛下欽咨故實率由令典昔在有晉經創江左
邦訓莫釐遠國多缺萬雉之外兩觀弗興空指
南峰懸法無所世歷三代年將二百非所以經
世成務垂業後昆天德圓應憲章自遠詔匠人

建茲象闕俯藉愛禮之心以申子來之願式表
端闈儀刑萬罔使觀風而至復聞正歲之典遐
想之士少寄懷古之目

為柳世隆上銅表

夫幣以周務貨以賑民阜國康治莫尚乎此周
氏致平始於圓法漢壺幾厝資於貫朽名鑪化
金良工盡執方將盈金中藏收功上苑南楚陋
其方府西京鄙其部內

謝立皇太子賜絹表

沈隱侯集 卷三
臣聞重離在天八紘之所共仰明兩作貳萬國
所以咸寧太子體岐弱載表睿冲茂典冊旣升
休祚方遠率土含歡遐邇均抃天情載洽慶賜
必周幣帛嘉貺猥班庸劣

到著作省表

臣約言卽日被召以本官兼今職臣藝不博古
學謝專家乏懷鉛之志慙夢腸之術聯事幸善
握蘭慙良謬勒斷蛇之符預刊冰河之業路遙
難騁才弱未勝而神工曲造離絢彌疊珥筆史

觀記言文府趨奉載揚腴懣交顏

舉胡元秀表

竊惟經邦御遠雖待大賢摧鋒犯鏑亦資小用
伏見錢塘新城主胡元秀早歲驅馳意幹強果
矛盾之用氣凌百夫若置之六師之間處之一
旅之上必能前奮曠敵却沮強胡臣實庸懦不
窺武節昧妄輕言伏懷悚懼

上撰進宋書表

臣約言臣聞大禹刊木事炳虞書西伯戡勅功

沈隱侯集 卷三
五
煥商典伏惟皇基積峻帝烈弘深樹德往朝立
勳前代若不觀風唐世無以見帝媯之美自非
覩亂秦餘何用知漢祖之業是以掌言未記爰
動天情曲詔史官追述大典臣實庸妄文史多
闕以茲下才對揚盛旨是用夕惕載懷忘其寢
食者也臣約頓首死臯竊惟宋氏南面承歷統
天雖世窮八主年減百載而兵車亟動囹道屢
屯垂文簡牘事數繁廣若夫英主啓基名臣建
績拯世夷難之功配天允宅之運亦足以勒銘

鐘鼎昭被方策及虐后暴朝前王罕二國釁家
禍曠古未書又可以式規萬葉作鑒于後宋故
著作郎何承天始撰宋書草立紀傳止於武帝
功臣篇牘未廣其所撰志唯充文律歷自此以
外悉委奉朝請山謙之謙之孝建初又被詔撰
述尋值病亡仍使南臺侍御史蘇寶生續造諸
傳元嘉名臣皆其所撰寶生被誅大明中又命
著作郎徐爰踵成前作爰因何蘇所述勒爲一
史起自義熙之初訖于大明之末至於臧質魯

爽王僧達諸傳又皆孝武所造自永光以來至於禪讓十餘年內闕而不續蓋代典文始末未舉且事屬當時多非實錄又立傳之方取捨乖衷進由時旨退傍世情垂之方來難以取信臣今謹更創立製成新史始自義熙肇號終於昇明三年相玄譙縱盧循馬魯之徒身為晉賊非關後代吳隱謝混郗僧施義止前朝不宜濫入宋典劉毅何無忌魏詠之檀憑之孟昶諸葛長民志在興復情非造宋今竝刊除歸之晉籍臣

遠媿南董近謝遷固以閭閻小才述一代盛典屬辭比事望古慙良鞠躬踟躕汗亡厝本紀劉傳繕寫已畢合七帙七十卷臣今謹奏呈所撰諸志須成績上謹條目錄詣省拜表奉書以聞臣約誠惶誠恐頓首頓首歟辜死罪

爲晉安王謝南兗州章

臣以萊孱幼無秀業依天宅照藉海憑瀾王爵早加藩麾夙樹進不能閑詩西楚好禮北河退無以振采六條宣風萬里懷慚起思載溢心顏

而皇明輝燭照被彌遠遂乃徙旆淮區遷金濟
服朱驂出郟青組臨方瞻惟徵寵俯仰亡厝

聖

為安陸王謝荊州章

東託景宸區早延休寵身班帝穆爵首蕃珪好
禮慙河敦詩愧楚懸旆出關遠違都闕縱金入
濟識譟戎麾而照臨靡廣復叨匪服紀南形勝
任總上游西緯岷邛北經嶠陝六轡在手猶或
稱難羣牧稟威茲術訊易是以摠情陞曲布款
幄垂霄塗嚴遠事隔披照腆冒斯顏膺此謬荷

祇奉兢據罔知攸託

為六宮拜章

蓬閨菲質嘉淑無算越自幽衡登軀宸漢奉日
月之華侍巾屣之末何以廁鴛鸞之盛序奉屬
車之清塵

奏 彈文

荅武帝修定樂書奏

竊以秦代滅學樂經燬亾至于漢武帝時河間
獻王與毛生等共採周官及諸子言樂事者以

作樂記其內史丞王定傳授常山王禹劉向校書誼樂記二十三篇與禹不同向別錄有樂詩四篇趙氏雅琴七篇師氏雅琴八篇龍氏雅琴百六篇准此而已晉中經簿無復樂書別錄所載已復亡逸按漢初典章滅絕諸儒捃拾溝渠牆壁之間浮片簡遺文與禮事相關者卽編次以爲禮記非皆聖人之言月令取呂氏春秋中庸表記緇衣皆取子思子樂記取公孫尼子檀弓殘雜非方幅典誥之書也記禮是行已經邦

之功故前儒不得不補綴以備事用樂書事大而用緩自非逢欽明之主制作之君不見詳議漢氏以來主非欽明樂記非人臣急事故言之者寡陛下以至聖之德應樂雅之符實宜作樂崇憲殷薦上帝而樂書亡尋案無所宜選諸生分令尋討經史百家凡樂事無大小皆別纂錄仍委一舊學撰爲樂書以起千載絕文定大梁之樂使五聲懷慙六莖興愧

奏彈王源

給事黃門侍郎兼御史中丞吳興邑中正臣沈
約誓首言臣聞齊大非偶著乎前誥辭霍不婚
坐稱往烈若乃交二族之穉穉伉合之義升降
宏隆誠非一揆固宜本其門素不相奪倫使秦
晉有匹涇渭無舛自宋氏失御禮教彫衰衣冠
之族日失其序姻婭淪雜罔計廝庶販鬻祖曾
以爲賈道明日腆顏曾無愧畏若夫盛德之胤
世業可懷欒郤之家前徽未遠旣壯而室竊貲
莫非阜隸結褵以行箕帚咸失其所志士聞而

傷心舊老爲之歎息自宸歷御寓弢革典憲雖
除舊布新而斯風未殄陛下所以負宸興言思
清敞俗者也臣實懦品謬掌天憲雖埋輪之志
無屈權右而狐鼠微物亦蠹大猷風聞東海王
源嫁女與富陽滿氏源雖人品庸陋胄實參華
曾祖雅位登八命祖少卿內侍帷幄父璿升采
儲闈亦居清顯源頻叨諸府戎禁預班通徹而
託姻結好唯利是求玷辱流輩莫斯爲甚源人
身在遠輒攝媒人劉嗣之到臺辨問嗣之列稱

沈隱侯集卷三
吳郡滿璋之相承云是高平舊族寵奮胤胄家
計溫足見託為息鸞覓婚王源見告窮盡即索
璋之簿閱見璋之任王國侍郎鸞又為王慈吳
郡正閤主簿源父子因共詳議判與為婚璋之
下錢五萬以為聘禮源先器嬪又以所聘餘直
納妾如其所剗則與風聞符同竊尋璋之姓族
士庶莫辨滿奮身殞西朝胤嗣殄歿武秋之後
無聞東晉其為虛託不言自顯王滿連姻寔駭
物聽潘楊之睦有異於此且買妾納媵因聘為

資施衿之費化充牀第鄙情贅行造次以之糾
慝繩違允茲簡裁源即罪主臣謹案南郡丞王
源忝藉世資得參纓冕同人者類異人者心以
彼行媒同之抱布且非我族類往哲格言薰蕕
不雜聞之前典豈有六卿之胄納女於管庫之
人宋子河魴同穴於輿臺之鬼高門降衡雖自
已作蔑祖辱親於事為甚此風弗翦其源遂開
黜世塵家將被比屋宜寘以明科黜之流伍使
已污之族永愧於晷辰方媾之黨革心於來日

沈隱公集 卷三
臣等參議請以見事免源所居官禁錮終身輒下
禁止視事如故源官品應黃紙臣輒奉白簡以聞

彈祕書郎蕭遙昌

謹按兼祕書郎臣蕭遙昌盛戚茂年升華祕館
泚慎之迹未彰違情之容已及宜寘徽網以肅
朝風請以見事免遙昌所居官

彈御史孔橐題省壁悖慢事

謹按奉朝請臺侍御史臣孔橐海斥無聞謬列
華省假攝去來仕子常務况東臯賤品非藉豐

資旬日暫勞豈云卑辱而肆此醜言題勒禁省
比物連類非所宜稱黜之流伍實允朝憲臣等
參議請以見事免橐所居官輒下禁止

彈孔稚珪違制啓假事

臣聞禁憲有章士子攸慎守官有典觸網斯及
蓋所以崇威闡法下肅上尊謹按廷尉會稽品
中正臣稚珪歷奉朝班頻登要近九棘之任理
無休謁冒制干聞實虧恒典恩許雖降所制不
關違犯之條猶合約黜且稚珪俯自內轄作士

下闡通制明文日陳凡按自踰規矩莫斯爲甚
臣等叅議請以見事免稚珪所居官除中正官
名輒下禁止

彈奉朝請王希聃違假

謹按奉朝請臣王希聃幸齒朝班私敬蓋闕休
請有期會無逾及違弛之愆允膺裁糾臣等叅
議請以見事免所居官輒下禁止

啓

賀齊明帝登祚啓

竊惟皇源浚遠帝寶連暉基深慶厚道貫萬葉
而鬱林凶德早樹行悖人經逖聽之所未書宗
廟之殆如綴百靈聳動九服迴遑結後來之望
思庇民之主日月以冀遐邇翹心伏惟陛下大
聖在躬君德夙表龍章日綵煥若麗天納麓賓
門道風遐被眷化神行無思不洽獄訟允歸天
人戴仰屈飛龍之眇轡紆汾陽之遠情運堯心
以臨億兆敷舜烈以膺寶命雖中宗之興殷道
宣后之隆漢德異世同符千載一揆刑措之業

方遠隆平之基在焉率土含欣懷生戴賴况臣
早蒙覆潤夙荷恩靈踊躍外畿心不勝慶謹緝
民和式流星澤塗歌里抃載懷鳧藻

謝齊竟陵王敎撰高士傳啓

竊聞高尚其事義光爰象賢者避世聲煥典墳
豈徒激貪勉兢澡身浴德而已爾乃大弘義訓
百代通風是以梁鴻蘇伯記遠迹於前叔夜士
安書高塵於後雖去取異情羣略殊軫而獨行
必彰斥言罔極貞操與日月俱懸孤芳隨山壑

共遠明公得一含道體二居宗迹屈巖廊之下
神遊江海之上凌奇商洛訪美東都蓋欲隱顯
高功出處同致巢由與伊旦竝流三辟與四門
共軌肅奉明規思自罄勛

爲東宮謝敕賜孟嘗君劔啓

田文重氣狗名四豪莫及寶劔雄身故能威陵
秦楚人高事遠遺物足奇謹加玩服以深存古
之懷

爲皇太子謝賜御所射雉啓

輕鑿微動密翳徐張黃閒所殼矢無虛發南皮
之獲未足稱工臣任惟守器事隔陪奉天慈曲
降賜物頒禽

謝司徒賜北蘇啓

曠阻陰山之外眇絕蒲海之東自非神力所引
莫或輕至聖慈普洽遍蒨薇停鑣思喘旣弘道
於世務方駕四衢又興言於俗表

上錢隨喜光宅寺啓

伏惟中陽故里春陵舊居夷湯滌蕩曾無遺築

若使人教早流法尊二代開塔白水建刹粉榆
可以傳美垂迹迄今不朽

送育王像并上錢燭等啓

竊以無名無色理絕應感不身卽身猶觀願力
惟願燈明道成長爲八喜之侶菩提無上永厠
千子之蹤

臨終勸加篤信啓

抱疾彌留迄今未化形神欲離窮楚盡毒據刀
坐劒比此爲輕仰惟深入法門厲茲苦節內矜

外恕寔本天懷伏願復畱聖心重加推廣微臣
臨塗無復遺恨雖慙色善庶等哀鳴

謝賜軫調絹等啓

霜紈雪委霧縠冰鮮咎劉氏歸國未聞漢儲之
禮曹植還蕃非降魏兩之賜恩愈枉道賁深束
帛

謝晏出宮門賜絹綺燭啓

栢室金縷本非所議孟姬作具獨若未周慈澤
曲臨珍華兼重製爲美服隻綺易儔舉而不息

三夜有待

爲柳世隆謝賜樂遊胡桃啓

挺自禁園味逾并絡動物迴祇在微必應此乃
胡羯奔逃吉之先見者也

謝賜甘露啓

約言左右徐儼宣敕垂賜法音寺松葉上甘露
臣往年經見不過霑條而已時或凝結纒若輕
霧未有玉聚珠聯光粲若是寔由積仁上通冥
德下降故能委華宵極霧被後彫慈旨曲洽頒

沈隱居集 卷三
此祥賚不任欣荷謹以啓事謝以聞

謝齊竟陵王賚母赫國雲氣黃綾裙襦啓
竊以積絲成綵散繭騰花巧擅易水之間價賈
藪臺之下民受祿為養霑荷彌深聖恩曲漸自
葉流根複袖緼裾豈伊恒飾榮新之寵固難輕
報

謝陶隱居木煎啓

此啓楊用修尺牘元本作沈約王元美增本作

庾肩吾以枕文類聚有肩吾謝隱居木煎啓及此啓故也然考隱居與休文往來甚習焉知不以魏肩吾者魏休文乎姑存集中以俟考

味重金漿芳踰玉液足使芝慚明麗丹愧芙蓉
坐致延生伏深銘戴

謝敕賜冰啓

竊惟司寒輟響眇自前代凌室曠官歷茲永久
聖功闡物逸典備甄窮深既採園池靡用有籍
羔秬無災霜雹

謝齊竟陵王宋永明樂歌啓

鳳綵鸞章霞鮮錦縟觀寶河宗未必比麗觀樂
帝所遠有慙惠雖日月在天理絕稱詠而徘徊

光景不能自息

謝賜絹葛啓

素采冰華絺文霜潔變溽暑於閨閣起涼風於襟袞

上陶隱居啓二首

先生穰秕流俗超然獨遠別霓羽帶總轡雲霞方當名書絳簡身游玄闕憑壘夕臥皇日朝餐而至理深微曖然難覩雖欲下風問道未知厥路若夫棲遲閒遠咀嚙璠芝出入清都師及靈

聖循崖返跡無缺惟心

生平愛嗜不在人中林壑之歡多與時奪日暮塗殫此心往矣猶復少存閑遠徵懷清曠結宇東郊匪云止息政復頗寄夙心時得休偃仲長遊居之地休璉所述之美望慕空深何可髣髴君愛素情多惠以二贊辭采妍富事義畢舉句韻之間光影相照倏覺此地自然十倍故知麗辭之益其事弘多輒當置之閣上坐臥嚙覽別卷諸篇竝爲名製又山寺旣爲警策諸賢從時

復高奇解頤愈疾義兼乎此遲比敘會爰共申
析

謝齊竟陵王示華嚴瓔珞啓

六時雨散百氏雲興或事止褻刺或義單小辯
莫不雕風烟之氣狀流日月之英華明公該玄
體妙凝神宙表廕法雲於六合揚慧日於九天
因果悟其初心菩提證其後葉陟無生之遠岸
泛正水之安流爰建三遠十號之尊崇四辯八
聲之妙極法身與金剛齊固常住與至理俱存

疏

南齊皇太子解講疏

皇太子以建元四年四月十五日集大乘望僧
於玄圃園安居寶地禁苑皆充供具珍臺綺榭
施佛及僧震玄音於六宵暢微言於末劫三達
宣其妙果十住讚其祥緣踐二氣而業升離九
旬而功就暨七月既望乃敬捨寶軀爰及輿冕
自纓已降凡九十九物願以此力普被幽明帝
室有嵩華之固蒼黔饗仁壽之福若有淪形苦

海得隨理悟墜體翺塗不遠斯復十方三世咸
證伊言茲誓或騫無取正覺

齊竟陵王發講疏

并頌

大矣哉妙覺之爲妙也無相非色空不可極而
立言垂訓以汲引爲方慈波慧水雖可漑而莫
知其源者也靈篇寶藉遠探龍藏蓋無得而言
焉至于義指天山之表文隱交河之外又非斷
籌所能筭也逮于祇樹菴園之妙吼四諦一乘
之正說重譯而通中土莫不恒沙之一焉而詞

源海廣理塗靈奧雖字流附響万軫同起分條
散葉離文析句未或暨其萬一也竟陵王殿下
神超上地道冠生知樹寶業於冥津凝正解於
冲念若夫方等之靈邃甘露之深玄莫有不遊
其塗而啟其室也秘藏之被東國者靡不畢集
皆繕以寶縑文以麗篆凝光瓊笥炫彩瑤滕思
欲敷震微言昭感未悟乃以末明元年二月八
日置講席於上邸集名僧於帝畿皆深辨真俗
洞測名相分微靡滯臨疑若曉同集於邸內之

法雲精廬演玄音于六宵啟法門於千載濟濟
乎實曠代之盛事也自法王已降暨于聽僧條
載如左以記其事焉乃作頌曰
十號神寂三達空玄迹由聖隱教以慈宣氛氲
緒法昭晰遺筌標聲妙住騰華寶蓮文擣龍藏
義溢中天惟王稟熒道冠增璿星羅寶幄雲開
梵筵思馳春馬理析爍蟬靈塲絢彩正水興連
乘茲上果永導芳緣

竟陵王解講疏 二首

夫憑形輝化必由委氣之塗因方導理必同肖
天之質是以表靈邃瑞誕聖王宮駐彩辰緯停
華日月故能積慈成聖累妙成空坦照路於道
場拔迷根於苦岸弟子蕭子良滌盥煩襟栖情
正業肅萃僧英敬敷慧典密藏奧文雲開雨散
今魄首丹達日弦上朔士步凝想空明屬念雖
神迹稍緬而遺塵在茲乃飾筵藻殿張帷盛邸
絜誠祇事建斯寶集蘭泉波涌芳藹雲迴秘理
探微玄況悠邈宗條旣舉窮功允就論堂卷座

義鼓停音乘此芳緣將升上住十方三世有證
無爽

夫妙極衆象湛恩必通理冠群方有感斯應自
鸞音輟唱圓光寢輝委華之相不傳踊地之符
已遠行言入道事難於造次一悟階空効隔於
俄頃若非積毫成仞累燭爲明無以方軌慧門
維舟法岸弟子是用夕惕載懷惟日不足者也
故敬集名僧演敷奧籍震微起滯輪動雲迴月
殿含吕魄弦上日甘露旣窮輟言寶座卷文罷

席衣屣相趨仰惟先后稟靈娥德叶景軒度道
載華岳化洽汾陰早棄蘭宮夙違椒掖千乘不
追萬鍾靡及終天之慕不續於短年歛報之誠
恩隆於求劫敬捨軀服以充供施藉此幽通控
情妙覺仰願聖靈速登寶位越四天之表記十
號之尊惟茲三世咸證於此敢誓丹衷庶符皎
日

南齊皇太子禮佛願疏

維年月朔日子皇太子諱稽首和南十方諸佛

一切賢聖夫至理可祈必憑誠於正覺極妙有感乃歸仰於真如然後取證現前獲驗茲日去歲皇帝暫虧御膳小廢乾行四海震惶百司戰悚諱歷劫多幸夙垂善緣忝生王家叨守儲嗣臣子心地倍用焦迫禁門旦啓欣問豎之安寢扉早闢訪饕夫之宰祗樹獨園伏膺下拜伽藍精舍繞足頂禮百神傲衛萬福具臻曾不信宿聖躬和愈豈非三寶之弘慈十號之法力旣而天從心欲誠願克果今於崇正殿奉還法會千

僧仍留百僧八關行道又度二士同日出家惟願藉此功德奉資皇帝陛下壽與南山共久年將北極俱長道懋農軒德高堯舜上界八萬之劫可期下方七百之祚未擬元良之位長守膝下之懽上嗣之所未保懷袖之愛以茲法田奉中宮皇后殿下福履攸善無思不屆天母之德厚載不能加任妙之盛坤儀寧足匹未及諸王妃主宮掖嬪房未來因緣過去眷屬竝同茲辰預比慈善又普爲積苦餓鬼受罪畜生三途八

難六道十惡水陸蠢動山藪翾飛濕生化生有
想無想皆藉今日慈悲咸遙浣濯人天攝受幽
顯證明庶憑衆力共相津濟謹疏

捨身願疏

優婆塞沈君敬白十方三世諸佛本師釋迦如
來安養阿彌陀世尊云云一切衆聖今日道俗
諸大賢德夫形非定質衆緣所聚四微不同風
火亦異析而離之本非一物燕肝越膽未足爲
譬靜念求我無肯可得而積此淪昏生生不已

一念儻值曾未移時障習相蕩旋迷厥路橫指
空呼名之爲有豐已傷物日夜靡休蓄身外之
財以充其慾攘非已之分用成其侈豈直溫肌
啗腹若此而已哉至於積篋盈藏未嘗登體溢
俎充庖旣飫斯棄曾不知粟帛所從事非因已
悠悠黔首同有其分離多共寡猶或未均我若
有餘物何由足仁者之懷不應若此侵他之財
世稱爲盜盜之甚者孰過於斯幽顯推求無一
或可君仰藉時來久乘休運玉粒晨炊華燭夜

沈隱庵集 卷三 四十四
炳自此迄今歷年三十遂乃服冕榮國裂土承
家潤盈身已慶流僕妾室非懸罄俸有兼金救
寒止於重裘而笥委餘襲冬夜旣蒙累蠶而積
有羸衾自斯已上侈長非一雖等彼豪家其陋
已甚方諸寔室所邁寔多悟此非常事由諸佛
有懷捨散空光道場飢寒困苦爲患乃切布蒲
州縣難悉經緣其當稱力因事一旦隨年頭目
髓腦誠難輕慕虧已贍物未易頓行誓欲廣念
深恩積微成著施路檀門冀或能踐以大梁天

監之八年年次玄枵日殷鳥度夾鍾紀月十八
在於新所創蔣陵皇宅請佛及僧髣髴祗樹息
心上士凡一百人雖果謝菴園鉢非香國而野
粒山蔬可同屬饜兼捨身資服用百有一十七
種微自損撤以奉現前衆僧夫室家患苦刀俎
非切制除蕭散形質超然蠢彼群生咸有佛性
不因翦削此路莫由緣業舛互世諦煩記變形
改飾卽事爲難故關以八支導彼清信一日一
夜同佛出家本弘外教事非僧法而世情乖舛

同迷斯路招屈名僧寘之虛室主人高臥取逸
閑堂呼爲八關去之實遠雖有供施之緣而非
斷漏之業約今謹自卽朝至于明旦排遣俗累
一同善來分畱上德勗成微志藉此輕因庶證
來果功德之言非所敢及

南齊南郡王捨身疏

弟子蕭王上白諸佛世尊道德僧衆夫色固無
象觸必歸空三世若假八微終散雖復廻天震
地之威窮於太滅齊冠楚組之麗靡救埃壤而

嗜慾易繁每疚心術捨施難弘用迷假照弟子
樹因曠劫嚮報茲生託景中璇聯華日彩玉組
夙紆蕃麾早建蘭池紫燕之乘擾於外閑黼帳
翠帷之飾光於中寢徒以心源尚滯情路未昭
識謝兼忘理慙獨悟不能叶調五氣綏御六神
霜暑或褰風露時舛是以敷襟上寶栖誠妙覺
敬捨肌膚之外凡百一十八種當令經衛以理
府給時順萬祉雲翺百妖窮滌望北極祗有恒
瞻南山而同求又願宸居納祐則天均慶少陽

介福儷日承休儲妃闡膺祥之符皇枝廣惟祺
之祚敬飾崇薨嚴置寶幄仰延息心旁旅清信
勗茲弘誓證其幽疑庶可以感降禎和招對靈
應玄塗匪昧要之無爽

義

佛知不異衆生知義

佛者覺也覺者知也凡夫之與佛地立善知惡
未始不同也但佛地所知者得善之正路凡夫
所知者失善之邪路凡夫得正路之知與佛之

知不異也正謂以所善非善故失正路耳故知
凡夫之知與佛之知不異由於所知之事異知
不異也凡夫之所知不謂所知非善在於求善
而至於不善若積此求善之心會得歸善之路
或得路則至于佛也此衆生之爲佛性寔在其
知性常傳也

六道相續作佛義

一切種智與五道六趣衆生共有受知之分無
分異也問曰受知非知耶荅曰非也問此以何

為體答曰相續不滅是也相續不滅所以能受
知若今生陶練之功漸積則來果所識之理轉
精轉精之知來應以至於佛而不斷不絕也若
今生無明則來果所識轉闇轉闇之知亦來應
以至於六趣也受知之具隨緣受知知之美惡
不關此受知之具也問曰知非知既聞命矣受
知受知自是相續不滅知自然因緣中來與此
受知之具從理而相關答曰有此相續不滅自
然因果中來有因有果何得無美無惡乎

因緣義

凡含靈之性莫不樂生求生之路參差不一
爾流遷塗徑各異一念之間衆緣互起一因一
果內有差忒好生之性萬品斯同自然所稟非
由緣立固知樂生非因緣因緣非樂生也雖然
復俱宅形骸而各是一物一念既召衆緣衆緣
各隨念起善惡二念誠有不同俱資外助事由
一揆譬諸非水非土穀芽不生因緣性識其本
既異因果不惑雖則必然善惡獨起亦有受礙

雖云獨起起便成因內因外緣寔由乎此也

記

南齊僕射王奐枳園寺刹下石記

佛教東流適來尤著始自洛京盛於江左晉故
車騎將軍瑯琊王劭玄悟獨曉信解淵微於太
祖文獻公清廟之北造枳園精舍其始則芳枳
樹籬故名因事立雖房殿嚴整而瓊刹未樹邵
玄孫尚書僕射南徐州大中正奐深達法相洞
了宗極勤誠外著仁隱內弘食不過中者一十

一載雖翼務朝端而事隣柰圃日者作翰湘州
樹麾蚤服位與年升秩隨歲厚顧惟恩隆主盼
寵結皇情任處東方寄深外屏徒欲盡能竭慮
知無不爲下被民和上宣聖澤而自以力弱途
遠終慙短效且義止今生報褰來果非以酬鴻
貺於冥津暢丹誠於遐劫自乘傳衡臯舜簪派
渚誓於舊寺炎櫺五層捐割蕃俸十遺其一凡
厥所收三十有六萬齊之末明六年六月三日
蓋木運將啓之令辰上帝步天之嘉日乃抗崇

表於蒼雲植重扃於玄壤仰願宸居納祐福履
攸歸八神驚室萬祗翼體寶祚隆邈比固須彌
靈筭遐永齊軌常住諸聖延祥挹天和於少極
蕃王碩茂播宗英於梁楚群后流克讓之風庶
民烝可封之德含生愷樂物不夭性嘉穀年登
餘糧栖畝夷荒由附邊城解析家備十善人懷
六度魔衆稽顙外道屈膝抽薪止火折劔摧鋒
拯幽酸於無擇陟神化於有頂三界五道咸同
斯願刊石重壤式昭厥心

諡議

德皇后諡議

表號垂名義昭不朽先皇后應祥月德比載坤
靈柔範陰化儀形自遠倪天作合義先造舟而
神猷夙掩所隔外運宜式遵景行用昭大典謹
按諡法忠和純備曰德賢而好禮曰德宜崇曰
德皇后

齊武帝諡議

臣聞天德平分而四時之名或異聖功一揆而

沈隱侯集 卷三
皇王之稱不同蓋跡因隨事名由義立堯臣禹
佐咸率茲典伏惟盡寂窮微含神獨照德茂始
裳之主道居初耕之君含精靈於五緯駕貞明
於三象初九勿用英氣凌雲負揭日月仰揚霄
漢龍姿鳳采煥若麗天登庸在試盛績雲舉雖
屈景潢汗降情尺木而拯世濟民浚發懷抱昔
成湯百家仁被比屋文王十里化先寡妻前聖
後賢重規沓矩震雄圖於九江播靈威於夏汭
旌旆未麾鯨鯢自殞弗勞羌棘之長無待六事

之人義等伐謀功高善陣建有國之符成定鼎
之業會朝清明事資於牧野受命作周非止於
西伯視瞻寢門孝德光備守器宗祧元良載遠
享大寶以君百辟敷景化以致隆平守在四夷
威行海內圉圉寂寞禮讓交興八柄馭下九官
咸事臨朝凝默尊嚴若神風行日烜無思不暢
至仁與造化爭流靈威與雷霆齊軌上貫蒼昊
下洞深泉春無凄風夏無苦雨時若罔愆多稔
如積三革不累五刃不砥庠塾大啓儒雅雲集

沈隱侯集 卷三
訓閱得宜蒐狩有序丹徼青丘之野跋踵反舌
之民浮深駕阻迴首革圖北夷畏力獻琛內款
不藉終軍之使無假絕漠之威嘉祥霧合祕瑞
泉涌史不輟文簡無虛日方當垂七曜之旗駕
八龍之乘望禮中嶽肆覲羣后造化不仁穆卜
愆應慕切遺弓哀同遏密晦朔不居殯宮將啓
勤茲大名宜盡徽極

齊明帝諡議

臣聞君德靡二辟王之名不一聖功無爽堯禹

之稱或殊兼以拯世寧亂致平未必同道崇墀
增祧嘉號不可相襲伏惟自天誕睿英聖在躬
皇矣之符夙著蒸哉之謠早集賓門納揆天平
地成自南自北無思不違在屬負圖導揚末命
值孛主狂凶人倫道盡宗社阡危瞻烏靡託罔
難立長亂極治刑四海樂推三靈以眷東向而
讓天下功高代入流涕而膺寶位如就重負日
昃劬勞躬親庶事撫辜納隍之念義同於罪已
振民厚下之情無廢於終食聰明神武逖聽邇

沈隱侯集卷之三
聞萬目被張紘綱靡漏御轡不迷寧藉聽於襄
野大川可濟不待備於舟楫崢嶸之下澤靡不
懷寥龐之上明無不燭包以宇宙潤以風雨霜
露所交人跡所至百姓仰之而不知其始萬物
用之而罔識其終上庠廢業忽焉已久三載弗
爲淪弛將及臨朝引領思隆雅訓覺遊胥萃俊
造成羣方將驅世反本既仁且壽告成東嶽高
宴汾陽造化不仁厭蒞云及放勳之慕不追負
鄉之思空遠殯宮將撤輶軫難畱英聲茂實於

是乎在

沈隱侯集卷之三







